

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 398434 21 St
Tuzla, 08.12.2021.godine

Općinski sud u Tuzli, stečajni sudija Antonela Đaković, u stečajnom postupku nad imovinom dužnika **"GIALES" d.o.o. za konsalting, posredništvo i promet Gradačac u stečaju, ul. Sarajevska bb**, dana 08.12.2021.godine, donio je sljedeće:

RJEŠENJE

ZAKLJUČUJE SE stečajni postupak nad imovinom dužnika "GIALES" d.o.o. za konsalting, posredništvo i promet Gradačac u stečaju, ul. Sarajevska bb, **zbog nedovoljnosti stečajne mase.**

Rješenje o zaključenju stečajnog postupka objavit će se u "Službenim novinama FBiH" i na oglasnoj ploči ovog suda.

Po pravosnažnosti ovog rješenja isto će se dostaviti Odjeljenju registra privrednih subjekata Općinskog suda u Tuzli, radi brisanja stečajnog dužnika iz sudskog registra.

Obavještavaju se stečajni dužnik i stečajni upravnik da pravne posljedice zaključenja stečajnog postupka nastupaju 8 dana nakon objavljivanja ovog rješenja u „Službenim novinama FBiH“.

• b r a z l o ž e n j e

Rješenjem ovog suda, broj gornji, od 22.09.2021.godine otvoren je stečajni postupak nad imovinom dužnika "GIALES" d.o.o. za konsalting, posredništvo i promet Gradačac u stečaju, ul. Sarajevska bb, a za stečajnog upravnika imenovan je Nedret Kikanović iz Tuzle.

U toku stečajnog postupka prijave potraživanja podnijeli su povjerioci Porezna uprava FBiH, Kantonalni porezni ured Tuzla i Porezna ispostava Gračanica, te Uprava za indirektno oporezivanje BiH, Regionalni centar Tuzla.

Prije održavanja ispitnog i izvještajnog ročišta stečajni upravnik dostavio je u spis suda popis prijavljenih potraživanja, koji je objavljen na oglasnoj ploči i pisarnici suda, kao i Izvještaj o ekonomsko- finansijskom stanju stečajnog dužnika.

Na ispitnom ročištu održanom dana 15.11.2021.godine ispitane su prijave potraživanja povjerilaca, te su priznata potraživanja povjerilaca u ukupnom iznosu od 25.519,19 KM, kao potraživanja općeg isplatnog reda. Nakon ispitnog ročišta održano je izvještajno ročište na kojem je stečajni upravnik podnio izvještaj o provedenom postupku i izvještaj o ekonomskom stanju stečajnog dužnika. Iz izvještaja je utvrđeno da dužnik ne raspolaže imovinom koja bi predstavljala stečajnu masu, a troškovi stečajnog postupka su pokriveni uplaćenim predujmom od strane predlagača.

Na osnovu odredbe člana 197. Zakona o stečaju FBiH, stečajni upravnik je, imajući u vidu da nema stečajne mase iz koje bi se namirila bar djelimično prijavljena potraživanja, dana 05.11.2021.godine prijavio da postoji nedovoljnost stečajne mase.

Sud je rješenjem od 15.11.2021.godine, a koje je objavljeno u "Službenim novinama FBiH" broj: 94/21 od 24.11.2021.godine, javno objavio prijavu nedovoljnosti stečajne mase, a na osnovu odredbe člana 197 stav 3. Zakona o stečaju FBiH (Službene novine broj: 53/2021).

Odredbom člana 200. stav 1. Zakona o stečaju propisano je da stečajni sudija zaključuje stečajni postupak čim je stečajni upravnik izvršio diobu stečajne mase, u skladu sa članom 198. ovog zakona, a stavom 2 istog člana je propisano da je stečajni upravnik dužan za svoj rad, nakon prijavljivanja nedovoljnosti stečajne mase, posebno da položi račun stečajnom sudiji. Pored navedenog odredbom člana 200 stav 3. istog Zakona propisano je da ako se nakon zaključenja stečajnog postupka pronađu predmeti koji pripadaju stečajnoj masi, stečajni sudija će na prijedlog stečajnog upravnika, povjerioca stečajne mase ili po službenoj dužnosti odrediti naknadnu diobu. U ovom slučaju se na odgovarajući način primjenjuju odredbe člana 192. stav 3, i člana 193 i 194 ovog Zakona. Stečajni upravnik je u spis suda dostavio dana 30.11.2021.godine Obračun u skladu sa članom 198. Zakona o stečaju i 200. stav 3. istog Zakona.

Obzirom da stečajni dužnik nema imovine čijim bi se unovčavanjem namirila potraživanja povjerilaca, to je sud shodno odredbi člana 200. Zakona o stečaju zaključio stečajni postupak i odlučio kao u izreci rješenja.

Prema odredbi člana 204. stav 1. Zakona o stečaju (Službene novine FBiH broj: 53/2021) rješenje o zaključenju stečajnog postupka objavljuje se u „Službenim novinama FBiH“ i oglasnoj ploči suda.

Pravne posljedice zaključenja stečajnog postupka nastupaju 8 dana nakon objavljivanja ovog rješenja u „Službenim novinama FBiH“, a sve shodno članu 204. stav 3. Zakona o stečaju FBiH.

Odluka o brisanju pravnog lica iz javnih registara zasnovana je na odredbi člana 204. stav 5. Zakona o stečaju FBiH.

**Stečajni sudija,
Antonela Đaković**

POUKA: Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu u Tuzli, putem ovog suda, u roku od 8 (osam) dana, od dana objave rješenja u „Službenim novinama FBiH“.

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 398434 21 St
Tuzla, 08.12.2021.godine

Općinski sud u Tuzli, stečajni sudija Antonela Đaković, u stečajnom postupku nad imovinom dužnika **"GIALES" d.o.o. za konsalting, posredništvo i promet Gradačac u stečaju, ul. Sarajevska bb**, dana 08.12.2021.godine, donio je sljedeće:

R J E Š E N J E

Stečajnom upravniku Nedretu Kikanović iz Tuzle određuje se nagrada za rad, u postupku po prijedlogu za otvaranje stečajnog postupka, od 22.06.2021.godine kao dana pokretanja prethodnog postupka do zaključenja stečajnog postupka **u visini od 2.487,50 KM (dvije i po prosječne neto plaće u FBiH)**

Stečajnom upravniku Nedretu Kikanović dosuđuju se i materijalni troškovi koji se odnose na troškove prevoza, troškove korištenja telefona, troškove kancelarijskog materijala i troškove kopiranja dokumentacije za potrebe stečajnog postupka **u visini od 312,50 KM.**

Nalaže se Računovodstvu ovog suda da sa depozita (koji predujam je na račun suda u iznosu od 3.000,00 KM uplatio Alen Bošnjaković dana 10.06.2021.godine) uplati **iznos od 2.800,00 KM, neto na žiro račun stečajnog upravnika broj: 1995076056273970, otvoren kod Sparkasse bank d.d Sarajevo, filijala Tuzla.**

O b r a z l o ž e n j e

Rješenjem ovog suda 22.06.2021.godine pokrenut je prethodni postupak za utvrđivanje uslova za otvaranje stečajnog postupka nad imovinom dužnika, a dana 22.09.2021.godine otvoren je stečajni postupak nad imovinom dužnika **"GIALES" d.o.o. za konsalting, posredništvo i promet Gradačac u stečaju, ul. Sarajevska bb**, a za privremenog i stečajnog upravnika imenovan je Nedret Kikanović iz Tuzle. Imajući u vidu da je privremeni stečajni upravnik i stečajni upravnik na predmetu radio više od dva puna mjeseca te imajući u vidu složenost predmeta, privremeni stečajni upravnik je vrlo efikasno i brzo dostavio izvještaj o provedenom prethodnom postupku, kao i ekonomsko-finansijski izvještaj u stečajnom postupku to mu prema mišljenju ovog suda pripada naknada u visini od **2.487,50 KM** (dvije i po prosječne neto plaće u FBiH – posljednji objavljeni podaci za mjesec juli 2021.godine iznose 995,00 KM). Privremenom stečajnom upravniku i stečajnom upravniku pripadaju i materijalni troškovi u visini od ukupno 312,50 KM koji se odnose na troškove prevoza, troškove korištenja telefona, troškove kancelarijskog materijala i troškove kopiranja dokumentacije za potrebe stečajnog postupka, prema priloženom obračunu od strane stečajnog upravnika. Odluka o visini iznosa mjesečnog predujma nagrade i naknade za troškove prevoza, upotrebe privatnog mobitela, kao i ostalih troškova, sud je donio temeljem odredbe člana 25. stav 4. i člana 237. Zakona o stečajnom postupku ("Sl.novine FBiH" br.29/03.) i člana 1., člana 2., člana 4. i člana 6. Pravilnika o nagradama i naknadama vještaka, privremenog stečajnog upravnika, stečajnog upravnika i članova odbora povjeritelja u stečajnom postupku ("Sl.novine FBiH", br.71/2008.) i Tarife o nagradama i naknadama troškova za rad vještaka ("Sl.novine FBiH", br.33/06.).

STEČAJNI SUDIJA
Antonela Đaković

POUKA O PRAVNOM LIJEKU:

Protiv ovog rješenja dozvoljena je žalba Kantonalnom sudu u Tuzli, u roku od 8 dana, od dana prijema prepisa rješenja. Žalba se podnosi putem ovog suda u dovoljnom broju primjera.

